

La pi part d' voi aitre inclinne
 Mach a robe d' vanità,
 Cousta a l' è (povre doninne!)
 Tuta la vostra santità.
 J' avi 'l veso squasi tute,
 E 'l servel fora da post;
 D' esse bele, o esse brute.
 I sè tante scume d' rost.
 Gioventù, dnans piè ste fie,
 Pensè bin a lo ch' i fè:
 Seve nen ch' a son granghie,
 O sia ronse da brusè?

Le Mode.

CANZONE LII.

Oh quante mode baravantane,
 Ch' a va inventand la vanità!
 Ai passa pochi meis o smane
 Ch' un veda nen quaich novità;
 Che smargiassade,
 Che arlichinade
 Tant strambalà ch' a fan sturdi;
 Oh le mode, malan a le mode,
 E quand vorranne mai furni?
I n' eu vedune già tante e tante,
 Ch' a j' è pa meud d' tnie a ment;
 La pi part son gent galante,
 Ch' a l' an la testa pienna d' vent;
 Le persone sode
 A stan pa a le mode,
 Ansi ai peulo pa sufri.
 Oh le mode, ecc.

Le mode a son pr certe persone
 Ch' a san pa cosa fè dij dnè;
 O ch' a son bin bin tomone,
 Ch' a j' è pi car soens giunè,
 O fè dij debit,
 Comprand a credit,
 Con sent pastrocc mei da tasi.
 Oh che sproposit, oh che folie
 Andè sgairand cosi i quattrin
 D' antorn a tante frascarie
 Da butè ados ai buratin!
 Epur ch' ai vada
 Tuta l' intrada,
 La gent gridlinna veulo loli.
 Parland mach da sol dle quefure.
 Oh quanti toiro bin diferent!
 Riss, e topè, e anmaronure,
 E sinquant' atri cambiament;
 E ste smargiasse
 Con le carcasse,
 Ch' a smio giust d' rovat turni.
 Quante manere a son già trovasse
 D' orcin, bindei, fissu e colietà;
 E antorn dla testa ficognasse
 Punte, fior e gabriolè;
 Vaire cosète,
 Scufie e cornète
 Anne cambià già ai nostri di?
 D' un temp a portavo la quefa an testa,
 Or le mantilie a s' treuvo an us,
 Con so capus, massime d' festa,
 Ch' a s' buto ancora pi sul fus;
 E tute quante
 Con j' angagiante,
 Ch' a s' porto ansem fin a durmi.

Ventava vedie quand a portavo
 Coule gran creste a dontrè ren,
 A l'è sigura, ch' a smiavo
 Babao surti d' an mes al fen;
 Peui d' arsvole
 Sempre pi drole,
 Peui nen d' autut, ch' a l'è ancor pi.
 Dnans a portavo la genevrinna,
 Ades a porto 'l parasol;
 E d' aitre van con la caplinna,
 Ch' a smio propi un virasol;
 E tante a veulo
 Fè pi ch' a peulo
 Mach pr podeje compari.
 Prima fasendse le soe tresse
 Con un ponson a fasio 'l borlat,
 Peui con butè d' aguce spesse
 L' an comensà fesse 'l copat;
 Peui certe creste
 Ch' a smiavo d' seste,
 Con i canton largh sing o ses dii.
 Un viaggi a usavo le palatinne,
 - Ch' a l' era un gnoch e drolo d' port,
 Peui maraman le pelegrinne
 Or bianche, or neire, or d' altra sort;
 Mosche postisse
 E dle manisse,
 Vint cambiament son già surti.
 M' arcordo ancora ch' a s' pavonavo
 Con coule scirpe e coui mantò;
 Ch' a l' ero robe, ch' ai costavo
 Un diaschne e mes, ma nen del so;
 J' oimo badola,
 Portand baciola,
 Andavo d' vote lor fali.

Da li a poch temp son inventasse
 D' veste volant e petanler,
 A s' guarda nen a fè d' spesasse,
 Nè ch' 'l quajat sia linger;
 E d' meinagere
 D' mila manere
 Con i farabalà scufi.

Ades a porto dco lor le braje,
 E da gran temp i guardanfan,
 Ch' a smio gromo da polaje,
 Mobil dle fomne dij paisan;
 Sonne pa cose

Da feje gelose,
 E dè la baja ai so mari?

Tute le sgnore a veulo tavota
 La tabachera e mostra d' or,
 Quandbin ch' a sio senza dota,
 E lingerote com' un por;
 S' no brajo e crio,
 E tute a dio

Ch' l' stil d' ades a l' è cosi.

A veulo fesse ciamè madame,
 S' a fusso bin fomne d' sotror;
 E venta vedie dè ant le fiamme
 S' ai dan nen coul titol d' onor;

Ste damisele

Bin pativele,

Ch' a stanto aveje d' pan mufi.

Guardè pr rie ste mese sgnore
 A marcè con so servitorat;
 D' un temp andavo a tute j' ore,
 Ma senza tanti nufia pat;

Ades l' usansa

L' ha cambià ciansa,

E l' ambission a porta cosi.

S' a s' podeis desse la moda neuva
 D' fesse cambiè fin 'l mostas,
 I na vedrio fè la preuva
 Da motobin, e minca pas.
 E fomne e fie
 A son parie,
 Ch' 'l cambiament ai fa piasi.

D' scarpe e pantofle, d' vaire manere
 Omne giuamai vedù cambiè?
 D' seda, damasch brocà, e bandere,
 E d' bruna, e d' pann, e d' votornè,
 E d' bocle tante?
 Prchè galante,
 Fin ant i pè veulo lusi.

Ades a s' vedo dle toalete
 Ch' a costo quaich pessià d' sèchin,
 A son pa fave o nos confete,
 Ma bruti sgiaf al borgiachin;
 E li ste sgnore
 A spendo j' ore
 Dla matinà fin a mesdi.

Quanta materia, ch' ancor j' avria
 Da giunse a coust componiment,
 I seu pa quand i furniria,
 S' i doveis di minutament
 Tuta l' istoria
 Dla pompa e boria
 Ch' un ved a trionfè ogidi.

Ma son pa sole mach le fumele
 Ch' a l' abio ste mode e st' invension:
 J' oimo n' an dco soens dle bele,
 Nen d' inferior amirassion,
 Pur ch' a s' descreuva
 Quaich moda neuva,
 A na son dlongh ancarogni.

I veui però pi nen inoltrème
 A fè una neuva descriSSION ;
 Saria roba d'anojeme,
 E fè trop lunga la canSON ;
 Basta bucheje,
 Ch' un peul saveje
 Ch' a stan dco lor sui branch fiori.
 Ma dnans furni, lassè ch' i dia
 Dontrè parole su coui gran past,
 Ch' a l' è la moda dla sgnoria,
 Faita con tanta speisa e fast ;
 Quante portade,
 Che spamparade
 D' vin forestè e bocon squisi !
 A j' è surtijne una drola e bela
 D' andè pr li senza capel,
 Portand 'n stras sot a l' assèla
 Gnanch da regalè a un spaciafornel ;
 Saria d' pielo,
 E d' anciodelo
 An mes dla schinna o dl' amburi.
 Oh quanti mobil, ch' a son pa gnie,
 Bin diferent dai temp antich !
 Let, e burò, e tapissarie,
 Specc, e tremò, ch' a fan gran spich ;
 E d' care antreghe
 D' sofà e cadreghe,
 E cadregon, ch' a fa stupi.
 A brajo tuti ch' a j' è d' miserie,
 Ma tant le mode a van pa nen giù,
 Ansi a sosteno ste materie,
 Bin ch' a doveisso angagè l' mnù ;
 Ma pr mi a peulo
 Fè com' a veulo,
 Tant i peus nen feila capi.